



## UHAPŠEN BIVŠI GENERAL ARMIJE RBiH

# Sakiba Mahmuljina terete zbog Vozuće

Komandanta Trećeg korpusa Armije RBiH Tužilaštvo tereti po komandnoj odgovornosti za događaje od jula do oktobra 1995.

**P**ripadnici Državne agencije za istrage i zaštitu (SIPA), a po nalogu Tužilaštva BiH, jučer ujutro su u porodičnoj kući u Sarajevu uhapsili Sakiba Mahmuljina, bivšeg generala Armije Republike Bosne i Hercegovine. Mahmuljin je uhapšen pod optužbama za navodni ratni zločin počinjen u Vozući. Tačnije, tereti se za komandnu odgovornost.

Mahmuljin je izveden iz kuće uz pratnju pripadnika SIPA-e, kada mu je i saopćeno da je uhapšen zbog sumnje za počinjene navodne ratne zločine odreda „El Mudžahid“, koji je djelovao u skopu Trećeg korpusa Armije BiH.

Tužilaštvo BiH nakon što je jučer skoro četiri sata saslušavalo Mahmuljina, zatražilo je da mu se odredi jednomjesečni pritvor, potvrdio je za Faktor Fahrudin Imširević, advokat

Sakiba Mahmuljina.

### Hapšenje

Gospodin Mahmuljin je stabilna ličnost, ali nikome nije jednostavno kada mu se tako nešto desi. Mislim da se moglo i drugačije postupiti, a ne da se Mahmuljin hapsi, jer je on sve vrijeme bio dostupan istražnim organima. Moram dodati i da su pripadnici SIPA-e bili korektni prilikom privođenja – objasnio je za Faktor Imširević, advokat Sakiba Mahmuljina.

Sakib Mahmuljin, prema saopćenju Tužilaštva BiH, je osumnjičen za djelo ratnog zločina protiv ratnih zarobljenika, civilnog stanovništva, te ranjenika i bolesnika. Osumnjičen je da je u svojstvu komandanta Trećeg korpusa Armije RBiH, postupao protivno odredbama međunarodnog humanitarnog prava i Ženevskih konvencija.

Mahmuljin je osumnjičen za zločine počinjene u periodu od jula do oktobra 1995. godine za vrijeme izvođenja borbenih dejstava Trećeg korpusa ARBiH na širem području Vozuće, u kojima su učestvovali i pripadnici odreda „El Mudžahid“. Prema navodima Tužilaštva, pripadnici ovog odreda su za vrijeme borbenih dejstava, počinili ubistvo oko 50 ratnih zarobljenika srpske nacionalnosti koji su prethodno oteti od druge jedinice Trećeg korpusa, koja je izvršila zarobljavanje.

### Kebini dokumenti

Mahmuljin se tereti za nečovječno postupanje prema 20 ratnih zarobljenika i civila koje su navedeni odbijali odmah predati Vojnoj policiji. On se tereti da je imao informacije da se pripadnici ove jedinice spremaju počinuti spomenuta krivična djela ili da su ih već

počinili, ali nije ništa poduzeo kako bi spriječio zločine i kaznio počiniocima, te mu se stavlja na teret komandna odgovornost za krivična djela koja su počinili njemu podređeni pripadnici Odreda „El Mudžahid“.

Neposredno nakon hapšenja pojavila se spekulacije da je istraga protiv Sakiba Mahmuljina dijelom bazirana na dokumentima koje je prije godinu tadašnji potpredsjednik Federacije Mirsad Kebo predao Tužilaštvu BiH.

„Ne vjerujem da je Tužilaštvo BiH zasnovalo svoju istragu na dokumentima koje je svoje vrijeme predao Mirsad Kebo. Ne mislim da je on imao neke značajne dokumente kojima bi mogao utjecati na rad Tužilaštva - tvrdi advokat Imširević.

Mahmuljin je jučer ispitan u SIPA-i, a nakon toga i u Tužilaštvu BiH.

DŽ. SARIĆ-KOZIĆ I A. ŠARENKAPA

Page: 2

Reach: 0

Country: BOSNIA AND HERZEGOVINA

Size: 535 cm2

2 / 2



**Mahmuljin** je jučer predat Tužilaštvu BiH



**MAHMULJIN (lijevo):** Uhapšen u Sarajevu